

20210610 Ukol sa Relihiyon
Viktor Nonong Medrano

Sa tingin ko sa sarili ko, mas parang Budoanimista ako, ang singkretismo ng Budismo at Animismo. May oposisyon ang dalawang ito dahil sa Budismo, hindi raw mahahanap ang



kaluluwa, pero sa Animismo, ang kalikasan, bilang ang tao, halaman, hayop, bato, hangin, buwan, araw, salita, at iba pa, ay puno ng mga espiritu. Sa Budismo, naniniwala sa muling pagsilang, sa bagong buhay, pagkatapos mamatay.

Sabi ng iba, para raw akong mas Hindu. Ang Hindu, kung hindi asetikong nagrerenunsiya, ay naniniwala sa sensuwalidad, kasama na ang seksuwalidad. Naniniwala ang Hindu sa kaluluwang mag-uunyon sa Diyos pagkatapos ng mga reingkarnasyon. Maraming-marami ngang mga diyos sa Hinduismo, at may sentral na Trinidad ng mga Diyos sila.

Sa Kristiyanismo, naranasan ko na ang Katolisismo, Baptista, Pentekostal, Mormonismo, at Saksi ni Jehova. Itong huli ako mas naaattrak, dahil may pag-asa ang tao pagkatapos ng Armageddon nang Isang Libong taong pisikong paraiso sa Tiyera. May resureksiyon ng mga patay. Pagkatapos ng Milenyum, ililigtas si Satanas para test na distilasyon ng mga natirang tao. Magkakaroon ng gerang mas malaki sa Armageddon. Pagkatapos ng Milenyum, tutuloy ang buhay sa Tiyera. Sa Saksi ni Jehova, 144 000 birheng lalaki lamang ang pupunta sa Langit. Nasa Bibliya raw yaong sabi. Ang ibang marami ay sa Tiyera.

Sabi ng isang mayamang Intsik na lalaki sa Rideau Place dito sa Isla Lulu, "Di ka talagang naniniwala sa relihiyon." May point siya, dahil bilib ako sa siyensiya, sa agham.

Sa siyensiya, may pag-asang pagandahin ang mundo. Bukas naman ang isip ko sa mga relihiyon. Ang mga natutunan ko, lalung-lalo na sa Budismo, ay nagagamit ko sa tunay na buhay ko.